



9. august 2012

UKA 2013/73

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**2015-p ingerlanerani Kalaallit Nunaanni piniagassat avammut tunisassiarineqartarnerisa siuarsarnissaat pillugu 2015-p ingerlanerani misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens B. Frederiksen, Demokraatit)

**Tunngavilersuut**

Nunarsuaq tamakkerlugu atuisartut soqutigileraluttuinnarpaat inuussutissat avatangiisit paaralugit nungukkiartuutaanngitsumillu tunisassiarineqartarnissaat. Aamma maannagaaq takoreerparput aningaasarpasuit isertinneqartartut tunisassiallu pilerigineqarluartartut issittup raajai nunarsuarmi ataqqineqartumik MSC-mik nalunaaqutserneqarsimangaangata.

Taamatut inuussutissanik avatangiisit paaralugit nungukkiartuutaanngitsumillu tunisassiarneq aamma Kalaallit Nunaat allatigut iluaqusersinnaagaluarpaat. Neqi uumasunit piniartakkatsinnit nujuartunersooq akuutissartaqanngilaq aamma uumasut pinngortitami inuulluataarnikuupput ungoorneqartaratik taamatullu piniagassat nakkutigineqarput killilersorneqartarlutillu nungukkiartuutaanngitsumik piniarnissaq pillugu.

Taamaakkaluartoq inuussutissanik nioqqutissiagut aalisarnerminngaanniiginnagajak pisarput. Siunissami nunarsuami raajat, qalerallit aalisakkallu allat akiinut qilersorsimavallaarunnaassagutta, misilittariaqarparput allanik tunisassiorneq. Alloriarnerusinnaavoq piniagassat piniartakkatta neqaannik tunisassiornerup periarfissaanik killiinillu misissuineq.

Kalaallit piniartagaat avammut tunisassiarineqarnerulissappata ilaatigut qanoq iliortoqartariaqarnerooq aamma piffissap qanoq ilinerani tunisassiorneq annertusineqartarsinnaanersooq misissorneqartariaqarpoq tassunga ilanngullugu uumasut sorliit (suullu taakkunannga tunisassiarineqarsinnaasut ilanngullugit) siunissami tunisassiarineqartalissanersut, suut tunisassiorfigissallugit pitsaanerussanersooq kiisalu suut naammassineqartariaqassanersut suliffeqarfiit tunisassiorsinnaanngussapata taamatullu aamma kalaallit suliffiutaat tunisassiaallu piumasaqaatinut tunngatillugu qanoq inissisimanersut soorlu suut piumasaqaataanersut EU-p eqqussueqqusinninneranut piumasaqaatit malinneqassappata.

Aamma misissuinermi nalilersortariaqarpoq, piniagassaatigut qanoq pitsaanerpaamik tuniarneqarsinnaassanersut. Tamatumani paaseqqissaartariaqarpoq, kalaallit piniagassaat inuussutissallu tunisassiorfinnit isigineqarnerisut kiisalu pilersaarusiornegassaaq kalaallit piniagassaataannik nerisassianut isiginninnerup allanngortinniarnissaa assersuutigalugu uumasunik paarsilluarneq, avatangiisit nungukkiartuutaanngitsumillu atuneq angerneqassasooq kalaallit tunisassiaannik pisisoqarpat.

Qulaani taaneqartut killilersuutaasutut isigineqassanngillat, siunnersuutitulli misissuinerup sunik imaqarsinnaaneranik. Naalakkersuisut paasisimasalinnik sulisoqarpoq naliliisinnaasunik,

misissuinermi suut immikkuualuttut ilanngunneqassanersut sulinermi uumasuutitta nujuartat tunisassiarinerunissaannut angorusutagut ataqqillugit pilerisaarutigalugillu nungukkiartuutaanngitsumik piniarneq uumasunillu naalliutsitsinnginnissami tunngaviit aallaavigalugit.

**Pisortanut aningaasatigut allaffissornikkullu kingunissai**

Suliap piareersarnissaani sulisoqassaaq misissuinerullu suliarinerani, tassunga ilanngullugu pisorta qarfiit akornanni sulianik ataqatigiissaarinermi, suliffinnik namminersortunik suleqateqarnermi kiisalu avataaneersunik pisariaqarpat siunnersorteqarnermi. Tunngaviusumik aninaasartuutit  $\frac{3}{4}$  AC-årsværkimit annertunerussanngillat, ilanngutereerlugit nutserinissaaq.

**Namminersorlutik Inuutissarsiortunut aningaasatigut allaffissornikkullu kingunissai**

Aningaasatigut kinguneqarnerlussanngilaq imaluunniit siunnersuutip piviusunngortinnissaa allaffissornikkut inuutissarsiortunut namminersortunut aningaasatigut kinguneqarnaviannngilaq. Suliffiit piniagassaneersunik tunisassiorlut annertunngitsumik suleqataassapput suliffiit tunisassiornissaminut piareersimanerisa paasiniarnerannut atatillugu.

**Innuttaasunut aningaasatigut allaffissornikkullu kingunissai**

Siunnersuutp piviusunngortinneqarnera innuttaasunut aningaasatigut allaffissornikkullu kinguneqassanngilaq.